



Sì, a son dificii di imagjinâ chei doi...

Forsit a son dome un grum no ben definît di particulis atomichis.

Forsit a vivin su NGC 451 o su cualchi quasar, miôr, ce che nô o viodìn cumò come quasar...

Ma sì, dai...dingji a chei doi un biel aspjet marzian cun piel verde e antenonis e fasìnju

fevelâ... o ancje... fasìn che a sedin fats di robe slichiole e a tachìn la nestre storie. Us disarai di plui... ju metarai suntun planet che al zire ator di Betelgeuse.

Betelgeuse le viodês cuasi ogni gnot... e je cussì familiâr...

No fevelin chei doi... si mandin des frecuencis che nô no podìn sintî... anzit, miôr, si trasmetin dai odôrs, par comunicâ. Jo o ai tradusût chei odôrs (triscj) in peraulis.

I nons? O sieri i voi e o bat su la tastiere des letaris a câs!

Fgottjll al comuniche cun Suehdt. A son ducj i doi verts e slichiole e a respirin fluoro.

“Ah, vuê o ai fate une grande invenzion, savêso, Suehdt?”

“Sêso simpri daûr a pierdi timp cun chei automis alî? Viodêt che il Ministeri de Vuere prime o dopo us gjararà ducj i bêçs se o continuais a fâ mataranadis!”

Fgottjll al vierç a distance une urne di pseudo-veri-sylicât e al ven fûr un strani coso colôr di rose cun cuatri estremitâts e une sorte di bale ad alt; ta chê bale a son cinc busis... ma dentri di dôs di chês busis a son des balis blancjis cun tal mieç des sferis celestis... mah? Chel coso al à dai fii parsore de bale...

“Ma ce mataranade saressie chiste, Fgottjll? No ai mai viodude une robe cussì! Al somee un Fomalhautian ma al à dome cuatri estremitâts... si movial?”

“Si môf, si môf! Al vierç une di chês busis che al à ta chê bale par comunicâ cun ondis di sun...”

“Ondis di sun? Ma a saran cent millions di agns che lis entitâts no comunichin plui cun ondis di sun!”

“O ai decidût di produsi chescj cosos e di molâju bande di DYTHI 458.”

“DYTHI 458? Ma nol è nuie là!”

“Par nô che o vivìn ta chest ambient di gas. Ma dongje di DYTHI 458 e je une piçule pierre plene di hydroxigenon dulà che chescj cosos a podaran multiplicâsi!”

“Hydroxigenon? Mi ven gomit dome a sintî cheste robe!”

“Il coso al vîf se tu i paris dentri par une di chês busis dal hydroxigenon e dopo al à dai systemis di respirazion... che a van a azotoxygenon...cumò al à une sostanzie protetive parsore parcè che nol è ancjemò ativât... te nestre atmosfere al murarès ma ta chê pierre che e zire ator di DYTHI 458 si cjatarà ben!”

“Ma... e al Ministeri de Vuere us da bêçs par mandâ chestis robis su DYTHI 458? A fâ ce mo?”

“A colonizâ la piere par cirî di rompi un pôc i tabars ai Fomalhautians, no? Chest coso che o ai fat al è dome il prin di une lungje serie e dopo... si multipliche in pôc timp. Prime o dopo ducj i monts ator di DYTHI 458 a saran plens di chescj cosos.”

“Us saludi, o Fgottjll... o speri che cheste mataranade no us fasedi pierdi la reputazion.”

E cussì il nestri bon Suehdt al va vie. Lu sintîso? Tindêt ben la orele...

“Slic slic slic”.

di Checo Tam

#910

Note: conte che e je stade publicade intune Comugne dal 2004, ma che nus plâs riproponi.